

félögum hans, en samkvæmt læknisvottorði hlaut hún brot á mjaðmagrind meðan á innbrotinu stóð.

Brot það sem kærði er grunaður um að hafa framið getur varðað þungri fangelsisrefsingu samkvæmt 252. gr. almennra hegningarlaga, sbr. einnig 255. gr., sbr. 71. gr. sömu laga.

Með hliðsjón af því sem að framan er rakið og með vísan til rannsóknargagna málsins að öðru leyti er ljóst að hér er um mjög alvarlegt brot að ræða og aðferðin við framningu þess er öll hin hrottalegasta.

Þykir því rétt að taka kröfu RLR um gæsluvarðhaldsvist til greina með vísan til 4. tl. 1. mgr. 67 gr. laga um meðferð opinberra mála og ákveða að kærði skuli sæta gæsluvarðhaldi allt til miðvikudagsins 14. desember nk. kl. 17:00.

Úrskurðarorð:

Kærði, Hallgrímur Pétur Gústavsson, skal sæta gæsluvarðhaldi allt til miðvikudagsins 14. desember nk. kl. 17:00.

Miðvikudaginn 19. október 1988.

Nr. 128/1987. **Benedikt Óskarsson**

(Hilmar Ingimundarson hrl.)

gegn

Birni Emilssyni

(Gísli Baldur Garðarsson hrl.)

Fjárnámsgerð.

Dómur Hæstaréttar.

Mál þetta dæma hæstaréttardómararnir Guðmundur Skaftason, Guðrún Erlendsdóttir og Hrafn Bragason.

Áfrýjandi skaut máli þessu til Hæstaréttar með stefnu 10. apríl 1987. Hann gerir þá dómkröfu að hin áfrýjaða fjárnámsgerð verði úr gildi felld og honum dæmdur málskostnaður fyrir Hæstarétti.

Stefndi krefst staðfestingar á hinu áfrýjaða fjárnámi og málskostnaðar fyrir Hæstarétti.

Áfrýjandi var í bæjarþingi Reykjavíkur þann 31. október 1986 með stefnu áritaðri um aðfararhæfi skyldaður til að greiða stefnda 100.000,00 krónur ásamt 2,25% dráttarvöxtum á mánuði frá 2. júlí 1986 til greiðsludags og 15.400,00 krónur í málskostnað. Áfrýjandi greiddi ekki skuldina og þann 6. febrúar 1987 er fúgetaréttur Garða-kaupstaðar settur að heimili áfrýjanda Espilundi 10 þar í bæ af Rúnari S. Gíslasyni, fulltrúa bæjarfúgeta. Fyrir er þá tekið fúgetamál stefnda gegn áfrýjanda.

Samkvæmt gerðarbók fúgetaréttarins lagði fúgeti fram gerðarbeiðni og stefnu áritaða um aðfararhæfi. Síðan er bókað: „Fyrir gerðarbeiðanda mætir Gísli Baldur Gárðarsson hrl. og krefst fjárnáms fyrir kr. 100.000.- með 2.25% vöxtum á mánuði eða brot úr mánuði frá 02.07. '86 til greiðsludags, kr. 1.310.- fyrir gerðarbeiðni, kr. 15.400.- í málskostnað auk kostnaðar við gerðina og eftirfarandi uppboð allt á ábyrgð gerðarbeiðanda.“

Gerðarþoli var ekki heima og samkvæmt upplýsingum lögmans gerðarbeiðanda var enginn heima að Espilundi 10 og fór gerðin fram fyrir utan húsið. Að tilhlutan fúgeta var mætt af hálfu gerðarþola. Samkvæmt gerðarbókinni lauk gerðinni með eftirgreindum hætti: „Að kröfu umboðsmanns gerðarbeiðanda lýsir fúgeti fjárnámi í eign gerðarþola, bifnr. R-13517 teg. Mazda Rx7 árg. 1981 skráð eign gerðarbeiðanda, Björns Emilssonar. Fallið er frá virðingu.“ Bókunin er síðan undirrituð af fúgeta, þeim sem mætti að hans tilhlutan fyrir gerðarþola og tveimur vottum. Bókunin er hins vegar ekki undirrituð af hálfu gerðarbeiðanda.

Áfrýjandi byggir í greinargerð hér fyrir dómi kröfu sína um ógildingu fjárnámsgerðarinnar á því í fyrsta lagi að stefndur hafi gert fjárnám í sinni eigin eign fyrir dómkröfum á hendur áfrýjanda og í öðru lagi á því að fjárnám sé gert fyrir „2,25% vöxtum á mánuði eða broti úr mánuði“ enda þótt aðfararheimildin tiltaki 2,25% dráttarvexti á mánuði. Þá leggur hann fram endurrit fjárnámsgerðarinnar, sem í ýmsum atriðum er öðruvísi en það endurrit sem fylgdi dómsgerðum og á að vera af þeirri sömu fjárnámsgerð.

Í munnlegum málflutningi fyrir réttinum tíndi lögmaður áfrýjanda til ýmsar nýjar málsástæður, sem lögmaður stefnda mótmælti

sem of seint fram komnum. Með hliðsjón af 44. gr. laga nr. 75/1973 um Hæstarétt Íslands verður ekki tekið tillit til þessara nýju máls-ástaðna framur því sem rétturinn skal gæta að eigin frumkvæði. Ljóst er að fara ber eftir bókun fúgetaréttarins við úrlausn máls þessa, enda ekki deilt um að svo fór gerðin fram. Hefði lögmaður gerðarþola átt að snúa sér til fúgetaréttarins og afla sér rétttrar bókunar strax og hann hafði fengið í hendur misvísandi endurrit af bókun gerðarinnar í stað þess að áfrýja gerðinni af þeim sökum. Aðilar deila ekki um að gerðarþoli hafði keypt bifreiðina R-13517 af gerðarbeiðanda og var eigandi hennar þegar gerðin fór fram. Gerðarbeiðandi gat því bent á hana til fjárnáms hjá gerðarþola, hvernig sem skráningu hennar var annars háttað. Þar sem enginn hittist fyrir á heimili gerðarþola mátti gerðin fara fram við húsið, sbr. síðari hluta 2. mgr. 33. gr. laga nr. 19/1887 um aðför. Ekki er um það deilt að lögmaður gerðarbeiðanda hafi verið viðstaddur gerðina og fjárnámskröfur hans séu réttilega bókaðar. Þótt framlögð fjárnámsbeiðni hans sé nokkuð óljós þykir það ekki koma hér að sök þar sem bókunin er skýr. Að ofanskráðu athuguðu þykir mega staðfesta áfrýjaða fjárnámsgjörð í samræmi við framlagða fjárnámsheimild á þann hátt sem í dómsorði greinir.

Átelja ber frágang framlagðra endurrita af bókun áfrýjaðrar fjárnámsgerðar.

Áfrýjandi skal greiða stefnda 35.000,00 krónur í málskostnað fyrir Hæstarétti.

D ó m s o r ð:

Hin áfrýjaða fjárnámgerð er staðfest fyrir eftirfarandi fjárhæðum: 100.000,00 krónum með 2,25% dráttarvöxtum á mánuði frá 2. júlí 1986 til greiðsludags, 1.310,00 krónum fyrir gerðarbeiðni, 15.400,00 krónum í málskostnað auk kostnaðar við gerðina og eftirfarandi uppboð.

Áfrýjandi, Benedikt Óskarsson, greiði stefnda, Birni Emilsyni, 35.000,00 krónur í málskostnað fyrir Hæstarétti.

Dómi þessum ber að fullnægja að viðlagðri aðför að lögum.

Fjárnámsgerð fógetaréttar Gardakaupstaðar 6. febrúar 1987.

Ár 1987, föstudaginn 6.2. er fógetaréttur Gardakaupstaðar settur að Espilundi 10 og haldinn með undirrituðum vottum af Rúnari S. Gíslasyni ftr. Fyrir er tekið fógetamálið: Björn Emilsson gegn Benedikt Óskarssyni.

Fógeti leggur fram nr. 1 gerðarbeiðni og nr. 2 áskorunarstefnu áritaða um aðfararhæfi.

Fyrir gerðarbeiðanda mætir Gíslí Baldur Gardarsson hrl. og krefst fjárnáms fyrir kr. 200.000,00 með 2,25% vöxtum á mánuði eða brot úr mánuði, af kr. 100.000,00 frá 02.05.'86 til 02.06.'86, en af kr. 200.000,00 frá þ.d. til greiðsludags, kr. 1.310,00 fyrir gerðarbeiðni, kr. 26.400,00 í málskostnað auk kostnaðar við gerðina og eftirfarandi uppboð, allt á ábyrgð gerðarbeiðanda.

Gerðarþoli, sem býr hér, er ekki viðstaddur. Fyrir hann mætir að hlutan fógeta Guðmundur Sigurjónsson.

Mætti kveðst aðspurður ekki greiða kröfu gerðarbeiðanda. Fógeti áminnir mætta um sannsögli og skorar á hann að benda á eignir til fjárnáms.

Að kröfu umboðsmanns gerðarbeiðanda lýsir fógeti fjárnámi í eign gerðarþola, bifri. R-13517, teg. Mazda R x 7, árg. 1981, skráð eign gerðarbeiðanda, Björns Emilssonar. Fallið er frá virðingu.

Fógeti gætir leiðbeiningarskyldu sinnar gagnvart mætta, sem er ólöglerður, og brýnir m.a. fyrir honum að tilkynna gerðarþola fjárnámið og að ekki megi ráðstafa hinu fjárnumda á nokkurn hátt, er fari í bága við gerð þessa, að viðlagðri ábyrgð að lögum.

Upplesið, staðfest. Gerðinni lokið.